

Prezidénsia Konsellu Ministrus

VIII Governu Konstitusionál

Komunikadu Imprensa

Sorumutuk Konsellu Ministrus nian iha loron 14 fulan-setembru tinan 2022

.....

Konsellu Ministru aprova ona Projetu **Proposta Lei Orsamentu Jerál Estadu (OJE) ba tinan 2023**, ne'ebé apresenta husi Ministru Finansas, Rui Augusto Gomes.

Reseita sira Setor Públiku Administrativu nian hanesan US \$3.156.922.141, no despeza Setor Públiku Administrativu nian hanesan US \$3.155.715.306, inklui Fundu Kombatente Libertasaun Nasionál no orsamentu sira Seguransa Sosiál nian no ba Rejiaun Administrativa Espesiál Oe-Kusi Ambeno (RAEOA). Despeza sira ba servisu no entidade Administrasaun Sentrá ho valor dolar amerikanu millaun rihun 2,8. Despeza sira ne'ebé prevee ba Seguransa Sosiál ho valór dolar amerikanu millaun 235,7 no Rejiaun Administrativa Espesiál Oe-Kusi Ambenu (RAEOA) ho montante dolar amerikanu millaun 120.

Se la inklui orsamentu ne'ebé prevee ba Fundu Kombatente Libertasaun Nasionál, 33% husi orsamentu sei aloka ba kuadru institusionál, 35% ba kapitál sosiál, 11% ba dezvoltamentu ekonómiku, 18 % ba dezvoltamentu infrastrutura no 3% ba fundu kontinjénsia.

Projetu ba Proposta Lei ne'e prevee alterasaun balun iha taxa impostu seletivu ba konsumu nian, kompara ho saida ne'ebé define iha OJE tinan 2022 nian, liuliu:

- Masin-midar no produktu konfeitaria ba oin sei iha taxa impostu dolar amerikanu 1 ba kilograma ida;
- Bee kahur ho masin-midar ka edulkorante ka aroma seluk, no bebida sira la ho alcohol, la inklui sumu ai-fuan ka produktu ortíkola ba oin sei iha taxa impostu dolar amerikanu 3 ba litru ida;
- Valór taxa impostu atu aplika ba tabaku no produktu seluk mai husi tabaku, ba oin sai husi dolar amerikanu 50 kada kilograma ba dolar amerikanu 100 kada kilograma;
- Karreta sira ho ninia valor aas liu duké dolar amerikanu rihun 10 ba oin sei iha taxa impostu porsentu 10, karreta sira ne'ebé ho ninia valor aas liu dolar amerikanu rihun 25 ba oin sei iha taxa impostu porsentu 25, no karreta sira ne'ebé ho ninia valor aas liu duké dolar amerikanu rihun 50 sei iha taxa impostu porsentu 30.

Governo aprova Proposta Orsamentu Jerál Estadu ba 2023 ho valor billaun US \$3,16

Ministru Finansas, Rui Augusto Gomes, horiseik, loron 15 fulan-setembru tinan 2022, apresenta ba Konsellu Ministrus no hetan ona aprovasaun, Proposta Projetu Lei Orsamentu Jerál Estadu (OJE) tinan 2023 ho montante totál billiaun \$3,16 ne'ebé Governu sei distribui ba Entidades Estadu hamutuk 109 ne'ebé mak hola parte iha perímetru orsamentál 2023.

Montante globál billiaun \$3,16 ne'e hetan redusaun 8% ka millaun \$264 kompara ho OJE Retifikativu 2022.

Totál despesas globál billiaun \$3,16 kompostu husi Orsamentu Administrasaun Sentrá biliaun \$2,8 (montante ne'e inklui ona Fundu Kombatentes Libertasaun Nasionál, billiaun \$1). Orsamentu Seguransa Sosiál hetan alokasaun millaun \$235,7 no RAEOA millaun \$120. Montante despesas globál iha PPL OJE 2023 hanesan mós ho montante despesas globál iha Lei das Grandes Opções do Plano 2023 ne'ebé mak Prezidente Repúblika, José Ramos-Horta promulga ona iha fulan-juñu liubá.

Proposta orsamentu 2023 ne'e sei uza hodi finansia Programa 49 ho medidas prinsipál 275, organizadu iha área estratéjiku 16: Agrikultura, Pekuária, Peskas no Floresta; Ekonomia no Empregu; Turizmu; Dezenvolvimentu Rural no Abitasaun; Ambiente; Petróleu no Minerál; Eletridade no Enerjia Renovável; Konektividade Nasionál; Bee no Saneamentu; Edukasaun no Formasaun; Saúde; Inkluzaan no protesaan Sosiál; Kultura no Patrimóniu; Reforma Estadu; Defeza no Seguransa Nasionál; Relasaun Internasionál no Polítika Esterna.

Setór Kapital Sosiál hetan alokasaun 36%

Distribuisaun Tetu Agregadu Orsamentu Administrasaun Sentrá iha OJE 2023 bazeia ba setór importante sira iha Planu Estratéjiku Dezenvolvimentu: Setór Kapital Sosiál inklui Saúde, Edukasaun no Protesaan Sosiál hetan alokasaun millaun \$771,7 ka 36%. Tuir kedan ho Setór Kuadru Institusionál ho orsamentu alokadu millaun \$706,1 ka 33%. Dezenvolvimentu Infraestrutura ho orsamentu alokadu millaun \$380,3 ka 18% no Dezenvolvimentu Ekonómiku ho orsamentu alokadu millaun \$230,6 ka 11%.

Programa Nutrisaun hetan alokasaun orsamentu millaun US \$ 10

Iha Proposta OJE 2023, Governu mós propoin ba Parlamentu Nasionál orsamentu ba Programa Nutrisaun ho montante millaun \$10. Ida-ne'e representa aumentu *quatro vezes* ka porsentu atus-haat (400%) kompara ho orsamentu alokadu ba programa Nutrisaun iha OJE 2022.

Submisaun PPL OJE 2023 ba Parlamentu Nasionál

Ho aprovasaun ne'e, ba oin Governu sei finaliza Livru sira OJE inklui Tabela sira no oficialmente sei entrega PPL OJE 2023 ba Parlamentu Nasionál iha loron 3 fulan-outubru atu diskute no aprova iha fulan-novembru nia laran molok haruka ba Prezidente Repúblika atu tetu.

Kalendáriu ne'e tuir ona espíritu Lei Foun Enkuadramentu Orsamentál ne'ebé mak promulga husi Prezidente Repúblika, Francisco Guterres Lú-Olo iha fulan-fevereiru liubá. Lei estruturante ne'ebé sai nu'udar baze ida ba Reforma Jestaun Finanseira Públikas iha Timor-Leste – konkista importante ida ne'ebé mak Oitavu Governu Konstitusionál lideradu husi Primeiro-Ministro: S.E. Taur Matan Ruak halo durante nia mandatu.

url: <http://timor-leste.gov.tl?lang=tp&p=31222>